

## **Амир Темурнинг ўзбек давлатчилиги тарихида тутган ўрни ҳақида**

Бобобекова Шоира -"Умид" ИДУМ ўқув  
ишлари бўйича дир. ўринбосари,  
Бобобеков Раҳимберди- Жиз ПИ  
академик лицей ўқитувчиси

**Аннотация:** ушбу мақолада Амир Темур Амир Темурнинг ўзбек давлатчилиги тарихида тутган ўрни ҳақида фикрлар баён этилган.

**Аннотация:** В статье описывается роль Амира Темура в истории узбекской государственности.

**Annotation:** This article discusses the role of Amir Temur in the history of Uzbek statehood.

**Калит сўзлар:** Амир Темур, адолат, юрт тинчлиги, мамлакат фаровонлиги, маънавий мерос

**Ключевые слова:** Амир Темур, справедливость, мир страны, процветание страны, духовное наследие.

**Keywords:** Amir Temur, justice, peace of the country, prosperity of the country, spiritual heritage

Ватан ва халқ тарихида шундай буюк сиймолар бўладики, улар ўзининг даҳо қобилияти, элу юртига бўлган буюк муҳаббати, шижаоти, садоқати билан янги даврнинг яратувчиси, асосчиси сифатида майдонга чиқади. Амир Темур Ватанимиз тарихида ана шундай буюк шахсdir.

Истиқлол шарофати ила мустабид совет хукмронлиги даврида ноҳақ қораланган Амир Темурнинг пок номи оқланди, бу зот сиймоси ўзбек халқининг тимсолига, фахри ва ғурурига айланди.

Президентимиз Ш.М. Мирзиёев таъкидлаганларидек: “Агар ҳар бир халқ, ҳар бир давлат мустақил бўлмаса, бошқалар унинг нафақат деҳқонини, нафақат ишчисини, ҳаттоқи шоиру олимини ҳам, давлат арбобини ҳам истаганча таҳқирлаши, инсоний шаънини тупроққа қориши мумкин экан.” [Мирзиёев Ш.М. 2017, 344 б.].

Дарҳақиқат, Темур Тарагайбек ўғли сиёсий кураш майдонига кириб келган XIV асрнинг 60 - йилларида мўғулларнинг Чигатой улусида бир ярим асрлик хукмронлиги давом этаётган, маҳаллий халқларга уларнинг зулми,

зугуми туфайли тушкунлик, парокандалик, бош-бошдоқлик жараёни ҳамон давом этмоқда эди. Жамият озодлик ва тараққиётга бўлган манфаатларини ўзида мужассам этган, халоскор ва етакчига муштоқ эди.

Ана шундай оғир вазиятда ёш Темурбек Мовароуннахрнинг сиёсий майдонига кириб келди. У мавжуд вазиятни ақлу заковати ила тўғри баҳолаб, она-Ватанини мўғуллардан озод қилиш ва “миллатнинг дардларига дармон бўлиш”ни ўз олдига мақсад қилиб қўйди. Бироқ, Амир Темурнинг ўз олдига қўйган орзусини амалга оширишга Балх ҳокими ғаразгўй, ҳасадгўй Амир Ҳусайн тўсқинлик қиласди. У Амир Темурнинг барча ишларига доимо панд беради.

Шу боис Амир Темур 1370 йилнинг баҳорида Амир Ҳусайн ўрнашиб олган Балх шаҳрига қўшин тортиб боради ва уни тор-мор келтиради. Амир Ҳусайнни қўллари боғланиб, Амир Темур хузурига олиб келинади. Бу ҳақда Амир Темур даври тарихчиси Шарафуддин Али Яздий ўзининг “Зафарнома” асарида шундай ёзади: Соҳибқирон амирларига қараб: “Мен унинг қонидан кечганман ва ундан интиҳом олиш тарихига чизик тортганман”,-деди. Ушбу эпизоддан Амир Темурнинг кечиримлилиги, ёмонлик қилганларга ҳам яхшилик билан жавоб қайтаришдек юксак фазилати намоён бўлади. Амир Ҳусайн томонидан Хутталон амири Кайкубод ўлдирилган эди. Амир Кайхусрав Хатлоний ҳақиқат сўраб, “...уни менга топширсинлар ва ундан шариат ҳукми бўйича қасос олайин”,- деб Соҳибқиронга арз қилди. Ҳазрат Соҳибқирон Кайхусравга таскин бериб: “Сен бу даъводан воз кечгил, сенинг биродарингнинг қони шундоқ ҳам уни тинч қўймайди”,- деди. [Али Яздий. 1994, 212 б.].

Тарихий манбаларнинг кўрсатишича, Чигатой улусининг-чингизийларнинг 1220-1360 йиллар ичидағи ҳукмронлиги даврида Самарқандда кўзга кўринарли бирорта ҳам ижтимоий бино қурилган эмас [Мўминов И. 1993, 26 б.].

Темур нима сабабдан ўз ҳокимиятининг маркази қилиб Самарқандни танлади? Бирорлар бунга сабаб қилиб Темурнинг биринчи бўлиб эгаллаган

ирик шаҳри Самарқанд эканлигини кўрсатсалар, бошқа бироқлар бунинг сабаби Самарқанд об-ҳавосиннинг яхшилиги, табиатининг гўзаллигига деб тушунтирадилар. Яна бирорлар эса Самарқанднинг қадимдан бери бутун дунёга маълум бўлганлиги, машхур Афросиёб худди шу шаҳардан Турон мамлакатини бошқарганлигини Темурни ушбу шаҳарни пойтахт қилиб танлашига сабаб бўлган бўлса керак, деб тахмин қиласидар [Мўминов И. 1993, 26 б.].

Амир Темур томонидан жуда қадимий ва бой тарихга эга, қулай жуғрофий худудда жойлашган Самарқанд давлат пойтахти сифатида танланди. Ҳақиқатдан ҳам Самарқанд “Зафарнома” асарида айтилганидек, “Даштининг фозиллигидан, боғларининг таровати, иморатларининг яхшилиги, сувларининг равонлиги шуҳратидан, бошқа диёрлардан хижил қиласидан ва турли шаҳар ва ўлкаларнинг рашкини келтирадиган ул муборак шаҳарни давлат байроғининг марказига айлантириб, пойтахт қилди. У (шаҳар) қўргонининг қалъасини қуришга, олий иморатлар ва тиллакори қасрлар барпо этишга фармон берди... Натижада тез орада Самарқанд ул динпарвар жаҳондорнинг ҳукмронлиги ва адолати баҳтига, ўта ободлигидан, аҳоли ва яшовчиларнинг кўплигидан, дунёning атроф ва чеккаларидан келиб-кетувчиларнинг серқатновлигидан, шу даражадага етдики, унинг овозасидан - шуҳрати Мисрни ортда қолдирди” [Али Яздий. 1994, 127 б.].

Дарҳақиқат, Амир Темур даврида Самарқанд ер юзининг сайқалига, обод ва гўзал, машхур шаҳарга айланган эди.

Амир Темур даври тарихчиси Ибн Арабшоҳ ҳам ўзининг “Ажойиб ал-мақдур фи тарихи Таймур” асарида: “Темур Самарқанднинг атрофлари ва этакларида бир неча қасобалар бунёд қилиб, уларни шаҳарлар келинчаклари бўлган Миср (Қоҳира), Дамашқ, Бағдод, Султония, Шероз каби азим ва марказий шаҳарлар номи билан атади. Самарқанд билан Кеш ўртасида бир бўстон барпо этиб, унда бир қаср қурдирди ва уни Тахта Карача деб атади.” [Ибн Арабшоҳ. 1992, 82 б.].

Бинобарин, Соҳибқироннинг Самарқанд атрофидаги қишлоқларга, машхур шаҳарлар номини беришда катта маъно ва мазмун бор.

Амир Темур улуғ амирлик мақомига эришгач, биринчи навбатда ўз олдига қўйган буюк мақсадини, яъни кучли марказлашган давлат барпо қилиш ниятини амалга ошира борди.

Соҳибқирон Темур бир неча йиллар олиб борган ҳарбий юришлари, дипломатик маҳорати, усталик билан қўллаган тадбирлари туфайли мамлакат худудларини мўғуллар асоратидан халос этиб, сиёсий тарқоқлик, парокандалик, ўзаро низоларга барҳам бериб, ягона марказлашган давлатга асос солди ва бу давлатни ақл-заковат ва ҳукуқий асос билан идора қила бошлади. Унинг: “Давлат ишларининг тўққиз улушини кенгаш, тадбир ва машварат, қолган бир улушини қилич билан амалга оширдим”,-деган сўзлари фикримизнинг ёрқин далилидир. Буюк аждодимиз умрининг мазмунини “миллатнинг дардларига дармон бўлишдан иборат” деб билди.

Амир Темур кучли, марказлашган давлат барпо этиш баробарида ўз кудратини жаҳонга машхур қилиш, худудларини кенгайтириш, жуғрофий кенгликларга чиқиш мақсадида XIV асрнинг 80-йилларидан бошлаб кўплаб ҳарбий юришлар ҳам олиб борди. Унинг давлати 1386-88 йиллардаги “уч йиллик”, 1392-1396 йиллардаги “беш йиллик” ва 1398-1404 йиллардаги “етти йиллик” олиб борилган урушлар натижасида Эрон, Кавказорти худудлари, шимолий Хиндистон, Сурия, Ироқ ерлари ҳамда Кичик Осиёнинг катта ерлари хисобига кенгайди. Шу тариқа қудратли салтанат вужудга келди ва унинг довруғи бутун оламга ёйилди.

Шу ўринда айтишимиз жоизки, бу юришлар гоҳо мамлакат худудларига тажовуз қилган ажнабий қучларга зарба бериш, гоҳо муқаддас ислом таълимоти ғояларини таҳқирловчилардан ҳимоя қилиш ёхуд Соҳибқирон диёрига доимо душманлик қилиб келган давлатларга қарши сўнгги чора сифатида амалга оширилган.

Соҳибқирон ўзининг жаҳонгирлик юришлари натижасида қўлга киритган юртлари, айрим-айрим ҳудудларни ўз фарзандлари, набираларига

суюрғол мулк қилиб берган, бироқ у ўз салтанатининг юраги, она-юрти Мовароуннаҳрни бирор зурриёдига мулк қилиб бермади. Демоқчимизки, Амир Темур Ватан муқаддаслигини, ягоналиги ва бутунлигини ҳар нарсадан устун қўйди.

Амир Темур ўз олдига буюк салтанатнинг ички сиёсати ва ишchan давлат тизимини қадимий тажрибалардан ижодий фойдаланган ҳолда тузиш, ҳарбий сиёсатни замон талаби асосида тобора такомиллаштириб, мўғул истилоси асоратларини тезроқ бартараф этиш, хўжаликни оёққа турғизиш, савдо-сотиқ, ҳунарманҷчиликни бир меъёрга тушириш ва ривожлантириш, аҳоли манфаатларини ҳимоя қилиш, илм-фан, маданият, меъморчиликни тубдан такомиллаштириш, ободонлаштириш ишларини кенг кўламда жадаллаштириш каби долзарб вазифаларни қўйган эди [Эшов Б.Ж., Одилов А.А. 2014, 442 б.]. Унинг бундай саъй-ҳаракатлари бир неча ўн йиллар инқирозий ҳолатда бўлган улкан ҳудудни қолоқликдан чиқариш, уни юқори тараққиёт босқичига кўтаришда катта куч-ғайрат, билим ва оқилона тадбирларни талаб этар эди.

Хулоса қилиб айтганда, Соҳибқирон Амир Темур Мовароуннаҳрнинг яхлитлиги ва бутунлигини кўз қорачиғидек асрари. Бобокалонимиз ўз даврининг ҳақиқий ватанпарвар фарзанди эди. Унинг ички ва ташқи сиёсати мамлакатни иқтисодий, сиёсий ва маданий жиҳатдан юқори даражага кўтаришга қаратилди. Шу ўринда айтиш жоизки, ҳали бирорта Европа давлатлари ўз конституцияларига эга бўлмаган бир даврда, Амир Темур ўз “Тузуклари” асосида салтанатни одилона бошқарди.

“Темур тузуклари” ҳаёт тажрибаси ва синови бошидан ўтган, бир умр эл-юрт, салтанат ташвиши билан яшаган фидойи шахс, буюк давлат арбобининг ўй-фикрлари, мушоҳада ва кечинмаларини ўз ичига жо қилган.

Амир Темур “Тузуклари”да: “...Одам Атодан бошлаб Хотам ул анбиёгача, улардан ҳозирги дамгача ўтган сultonларнинг қонунларини ва туриш-турмушларини донолардан сўраб-суриштиридим. Ҳар қайсилирининг йўл-йўриқлари, туриш-турмушлари, қилиш-қилмишлари, айтган гапларини

хотирамда сақладим ва яхши ахлоқлари, маъқул сифатларидан намуна олиб, унга амал қилдим”,-деб таъкидлашининг ўзи ҳам мазкур шахснинг ўзбек давлатчилик тарихида нечоғлик катта ўрин тутишининг яққол ифодасидир.

### **Фойдаланилган манба ва адабиётлар:**

1. Мирзиёев Ш.М. Буюк келажагимизни мард ва олижаноб халқимиз билан бирга қурамиз. Т.: Ўзбекистон, 2017.
2. Шарафуддин Али Яздий. “Зафарнома”, Т.: “Камалак”, 1994.
3. Мўминов И. Амир Темурнинг Ўрта Осиё тарихида тутган ўрни ва роли. Т.: “Фан”, 1993.
4. Ибн Арабшоҳ. “Ажойиб ал-мақдур фи тарихи Таймур”. 2-китоб. Т.: “Мехнат”, 1992.
5. Темур тузуклари. Т.: “Ғафур Ғулом” нашриёти, 1991.
6. Эшов Б.Ж., Одилов А.А. Ўзбекистон тарихи. Т.: “Янги аср авлоди”, 2014.